

四庫全書

史部

欽定四庫全書

史部

姑蘇志卷三十一

詳校官編修_臣曹振鏞

檢討_臣德生覆勘

總校官知縣_臣楊懋珩

校對官中書_臣李 燾

謄錄監生_臣李 德

欽定四庫全書

姑蘇志卷三十一

明 王鏊 撰

第宅

第宅園池何以書賢乎其人也賢乎其人則何以
及乎第宅園池古之人其不可復作矣君子思其
人而不見見夫人之所嘗止猶見夫人也詩云蔽
芾甘棠勿剪勿伐召伯所茇、

巫咸宅按越絕書舊圖經皆云虞山巫咸所居舊志云

在婁縣山下今婁縣止馬鞍一山無巫咸宅當在虞

山無疑

王賓詩舊說巫咸已上天楚人歌裏亦千年相傳住處今何在一座青山縣郭邊

太公石室在虞山室凡十所續圖經山東二里有石室

范氏志太公避紂居東海濱常熟去海近或是

林大

虛巖宛如室空洞神僊宅既非巨靈剖何勞五丁鑿
閉門鎖薜蘿寒煙縈翠幕疑通少室山或與紅塵隔
具瞻同廣厦生民誠可託
大庇安如山何愁風雨作

言偃宅在常熟縣西今稱言公巷吳地記云宅有井井

邊有洗衣石皆故物輿地志云石為太守蕭正德持

去

周霞賓詩列國推吞際人材北學難淒涼吳邑里
悵望魯衣冠舊宅歸蓬顆新祠倚杏壇一橋通夾

巷蔽井

樹陰寒

范蠡宅在太湖包山任昉述異記洞庭湖上有釣洲蠡

嘗乘舟至此遇風止釣于上刻字記焉洞庭記云在

杜圻洲馬跡山南方十里多桑苧菜菓又前志云在

東山翠峯寺

吳萊詩漠漠寒雲鶴影邊荒山故宅忽
千年大夫已賜平吳劍西子還隨去越

船白石撐空存蠹鼠青松落井化蛟蜃
徒憐此地無章甫只解區區學計然

馮驩宅按圖經在彈鋏巷唐人言宅傍有墳有碑驩蓋

孟嘗君使徵邑民債者彈鋏巷俗名長鋏巷

丁令威宅在陽山有丹井存焉

高啓詩令威作僊上天去舊宅留在青山阿千

年宅廢但遺井何處更聞華表歌南陌黃塵足去客東流碧海絕迴波鶴歸重覽應惆悵地上丘墳今又多周南老鶴僊丁令威宅枕陽山陸僊化鶴不返宅廢人已非餘遺丹井在井口苔生衣丹光時夜發猶能照巖扉月斜人籟寂鶴自遶東歸為歌華表吟但傷知音希

梅福隱居相傳在吳門西市坊

黃庭堅詩吳門不作南昌尉上疏歸來朝市空

笑拂巖花問塵世
故人子是國師公

蔡經宅吳地記言在朱明寺西王方平與麻姑嘗過其

家事具紀異

高啓詩崑崙主者王方平身騎黃麟朝紫京舉手長辭漢公卿得道不願世上

名往來隱玄與朱明洞中各有白玉城絳衣游空擁幢旌三山五嶽自按行冷風吹動天樂鳴瓊簫琅璈和鸞笙羽衛威踏山海崩龍車鶴馭紛相迎嘯呼神官走吏兵魑魅魍魎號且驚覲來經家駐雲輶人馬不見但有聲虎頭擎囊佩蒼精神光赫然照軒楹授以至言可長生九骨已作蟬蛻輕麻姑來會尋僊盟芳姿娉婷似飛瓊言從昔年宴蓬瀛又見弱水三淺清爪可爬背念始萌僊意已識遭笞榜餘杭阿姥酒罷頽躡景忽去煙雲橫家人悲望空惻惻桑田回首幾變更神僊在世每自呈凡夫不識等瞽盲丹元有田不解耕但愛狗苟還蠅營榮華未滿咎責盈忽化腐鬼歸荒塋金丹可學道可成木鑽石盤貴精誠誰能自拔水火坑飛游往來瑤樹英千載或有歸來情

陸績宅在臨頓里門有巨石初績罷鬱林太守歸無裝舟輕不可越海取石為重人稱其廉號鬱林石見唐

史陸龜蒙傳今石移置察院前號廉石

王璉賦鬱林石相傳台府

石來自鬱林州歷世經千載移封象一丘溫文思孝子瑩潔擬賢侯嘉樹繁陰護殘苔積翠浮濟舟曾鎮險入苑更無儔會有騷人拜應從使者求素書猶在匣神劒已藏韞知子多奇術相看解點頭

周公瑾宅在雍熙寺西故井猶存按漢建安三年孫策為瑜治第於吳今猶云周將軍巷宋太尉周虎居之因立武狀元坊

陸玩宅今靈巖山寺玩代王導為司空雅量宏遠獎納
後進縉紳皆蔭其德宇

何準宅在縣西二里捨為般若臺東北有般若橋俗云

朱明寺橋

見吳地記

王珣宅在日華里今景德寺也其別墅在虎丘

戴顓宅今北禪寺唐司勳郎中陸洿嘗居之有花橋水

閣見白樂天寄馮侍御詩鄭太卿嘗於此作水閣以

追故事

樂天詩揚州驛裏夢蘇州夢到花橋水閣
頭覺後不知馮侍御此中昨夜共誰遊

張融宅陸慧曉宅並在今承天寺其間有池池上有二

柳廬江何點曰池便是醴泉木便是交遜沛國劉璡

至吳謂人曰吾聞張融與慧曉並宅其間有水此水

必有異味命駕往酌飲之曰鄙吝之萌盡矣

王賓詩
兩處樓

臺一樣高空餘煙雨到今朝清心
不見當時水楊柳名存讓未消

屈突明府廳不知處所明府唐人以建昌宰休官吳中

李白詩陶令八十日長歌歸去來故人建昌宰借問
幾時迴風落吳江雪紛紛入酒盃山翁吟已醉舞袖

為君
開

李嘉祐宅嘉祐罷袁州刺史居此僧皎然有酬李員外
蘇臺屏居春首有懷詩

韋承總幽居孟東野有題韋承總吳王故城下幽居詩

東野詩云才飽身自貴巷荒門豈貧韋生堪繼相孟氏願依隣夜思琴語切畫情茶味新霜枝留過鵲風竹掃蒙塵郢唱一聲發吳花千片春對君何所得歸去覺情真

張籍故居在胥門

籍詩云共踏長安街裏塵吳門獨作未歸身胥門舊宅今誰住君過西塘

與問人此詩籍贈陸暢者觀此則籍為吳人可知矣

章博士宅在洞庭賈閭僊有題章博士居詩

麴信陵故居在包山信陵唐望江令有惠政白樂天有

詩

徐脩矩宅脩矩恩王府參軍世守書萬卷皮日休嘗就

借書

皮日休詩東莞為著姓奕代皆雋詰強學取科第名聲盡孤揭自為方州來清操稱凜冽唯寫

墳籍多必云清俸絕宣毫利若風劍紙光於月札更指欲胼萬通排未闕樓船若夏屋欲載如垤塼轉徙入吳都縱橫礙門闌縹囊輕似霧細帙殷於血以此為基構將斯用貽厥重於通侯印貴却全師節我愛參卿道承家能介潔湖田五萬步草屋十數椽微宦不能去歸來坐如廁保茲萬卷書守慎如羈紲念我曾苦心相逢無間別引之看秘寶任得窮披閱軸閑翠鈿剝籤古紅牙折悵解帶芸香卷開和桂屑枕兼石鋒刃

榻共松瘡癩一卧寂無喧數編者盡徹或携歸廨宇
或把穿林樾挈過太湖風抱宿支硎雪如斯未星紀
悉得分毫末剪除幽僻藪滌蕩玄微窟學海正狂波
余頭向中顛烏沒反聖人患不學垂誡尤為切苟昧
古與今何殊瘡共瞶五滑反昔之慕經史有以傭筆
札何況記斯文借之不曾輟吾衣任穀鱸吾食甘糠
覈其逆苟可尤斯文郡自伐何竹青堪殺何蒲重好
截如能盈兼兩便足酬饑渴有此競苟榮聞之兼可
噦東臯擗煙雨南嶺提薇蕨何以謝徐君公車不聞
設陸龜蒙嘗聞四書曰經史子集焉苟非天祿中此
事無由全自從秦火來歷代逢迍邐漢祖入關日蕭
何為政年盡力取圖籍遂持天下權中興延嘉時教
化還相宣立石刻五經置於太學前賊莽亂王室君
臣如轉圜洛陽且煨燼載籍宜為煙逮晉武革命生
民纔息肩惠懷亟寡昧戎羯腥膻已覺天地閉競
為東南遷日既不暇給墳索何由專爾後國脆弱人

多尚虛玄任學者得謗清言者為賢直至沈范輩沈
約范雲皆藏書數萬卷始家藏簡編御府有不足仍

令就之傳梁元渚宮日盡取如砥錄兵威忽破碎焚

蕪無遺篇近者隋後主搜羅勢駢聞寶函映玉軸彩

翠明霞鮮伊唐受命初載史聲連延砥柱不我助驚

波湧淪連遂令因去書半在餘浮泉真觀購亡逸蓬

瀛漸周旋晃然東壁光與月爭流天偉矣開元中王

道真平平八萬五千卷一一皆塗鉛按開元麗正殿

書錄云人間盛傳寫海內奔窮研自云西齋書有過

東臯田吾聞徐氏子奕世皆才賢因知遺孫謀不在

黃金錢挿架幾萬軸森森若戈鋌風吹籤牌聲滿室

鏗鏘然佳哉鹿門子好問如除痛脩來參卿處遂得

參卿憐開懷展厨簾唯在性所便素業已千仞今為

峻雲巔雄才舊百派相近浮日邊君苞王佐圖縱步

凌陶甄他時若報

德誰在參卿先

顧鍊師草堂在陽山唐李頻有詩

陸魯望宅在臨頓橋皮日休云不出郭郭曠若郊墅魯望幽居賦云陸子居金吳東距長洲故苑一里又云地接虎丘門臨鶴市又有別墅在甫里魯望躬耕於此有地數畝有屋三十楹有田奇四萬畝其居後為白蓮花寺建祠堂塑像咸淳中有盛氏子醉仆其像

於水腹中皆平生詩文親藁

皮日休詩其一一方瀟灑地之子獨深居遠屋

親栽竹堆牀手寫書高風翔砌鳥暴雨失池魚暗識歸山計村邊買鹿車其二籬疎從綠槿簷亂在黃茅

壓酒移溪石煎茶拾野巢靜窻懸雨笠閒壁挂煙袍
支遁今無骨誰為世外高其三繭稀初上簇醅盡未
乾牀盡日留蠶母移時祭麴王趣泉澆竹急候雨種
蓮忙更葺園中景應為顧辟疆其四靜解無人到幽
深每自知鶴來添口數琴到益家資壞塹生魚沫頽
簷落燕兒空將綠蕉葉來往寄閑詩其五夏過無甌
石日高開板扉僧雖與筒簾人不典蕉衣鶴靜共眠
覺鷺馴同釣歸生公石上月何夕約譚微其六經歲
岸烏紗讀書三十車水痕侵病竹蛛網上衰花詩任
傳漁客衣從遞酒家知君秋晚事白幘刈胡麻其七
寂歷秋懷動蕭條夏思殘久貧空酒庫多病束魚竿
玄想凝鶴扇清齋拂塵冠夢魂無俗事夜到金壇
其八閉門無一事安穩睡涼天砌下翹餓鶴庭陰落
病蟬倚杉閒把易燒朮靜論玄賴有包山客時時寄
紫泉其九病起扶靈壽脩然強到門與杉除敗葉為
石整危根薜蔓狂遮壁蓮莖卧枕盆明朝有忙事召

客斷桐孫其十緩頰稱無利低眉號不能世情都太
薄俗意就中憎雲態不知驟鶴情非會徵蓋臣誰奉
詔來此寫姜肱龜蒙詩其一近來唯樂靜移傍故城
居閑打修琴料時封謝樂書夜停江上鳥晴曬篋中
魚出亦圖何事無勞置棧車其二倩人醫病樹看僕
補衡茅散髮還同阮無心敢慕巢簡便書露竹樽待
破霜袍日好林間坐煙蘿僅欲交其三倭僧留海紙
山匠製雲牀懶外應無敵貧中真是王池平鷗思喜
花盡蝶情忙欲問新秋計菱絲一畝強其四故山空
自擲當路竟誰知祇有經時策全無養拙資病深憐
炙客炊晚信樵兒謾欲陳風俗周官未采詩其五福
地能容壑玄關詎有扉靜思瓊板字聞洗鐵筇衣鳥
破涼煙下人衝暮雨歸故園秋草夢猶記綠微微其
六水影沈魚器鄰聲動緯車燕輕捎墜葉蜂懶卧樵
花說史詳諸例論兵到百家明時如不用歸去種桑
麻其七禹穴奇編缺雷平異境殘靜吟封籙檢歸興

削帆竿白石堪為飯青蘿好作冠幾時當斗柄同上
步置壇其八強起披衣坐徐行處暑天上堦來鬬雀
移樹去驚蟬莫問鹽車駿誰看醬瓿玄黃金如可化
相近買雲泉其九野入青蕪巷陂侵白竹門風高開
栗刺沙淺露芹根迸鼠緣藤桁饑鳥立石盆東吳雖
不改誰是武王孫其十疎慵真有素時勢盡無能風
月雖為敵林泉幸未憎酒材經夏闕詩債
待秋徵祇有君同癖閑來對曲肱

丁晉公宅在大郎橋堂宇甚古有層閣數間臨其後號

晉公坊

三瑞堂在閭門之西楓橋孝子姚淳所居家世業儒以

孝稱蘇文忠公往來必訪之嘗為賦三瑞堂詩

蘇軾詩君

不見董召南隱居行義孝且慈天公亦恐無人知故
令鷄狗相哺兒又令韓老為作詩爾來三百年名與
淮水東南馳此人世不乏此事亦時有楓橋三瑞皆
目見天意宛在虞鰈後惟有此詩非昔人君更往求
無價手

寧極齋在飲馬橋郡人方士姚安世所居安世能詩文
亦辯博自號丹元子元祐末往來京師與王定國游
自言目接上清諸僊蘇子瞻一見奇之以為異人又
稱其詩有謫僊風采

五柳堂胡稷言所居在臨頓里陸龜蒙舊址也其子嶧

又取老杜宅舍如荒村之句名其居曰如村

酉室王伯起所居伯起字聖時楊邦弼序其詩有云伯起受經於王臨川學於曾南豐遊於曾宣靖公父子間諸公皆推輓之年未及衰一旦棄去卜居吳門獨處一廛扁曰酉室日焚香燕坐於其中其所為詩若

千卷號唱道野集

酉室記王聖時吾畏友也有室曰酉諉予記之室無方不以西名室

非時不以秋名非色也不以白名非聲也不以商名非味也不以辛名象數之所不能該也充不得而名流動非氣也堅利非物也金亦無所名焉是七者酉屬也散一為七名體各足合七為一且然一室方其

日薄虞淵行龍遯藏獸萃鳥下百二入息吾聖時磅
礴於無限逍遙乎其中鄰燭光謝石爐燼寒上下一
色四方易位蝙蝠野鼠飛走竄伏同會於寬閑廣莫
之地而自得樂也涼秋九月予將訪吳門願從公游
而為公記其屋紹聖十六
年七月釣臺江名闕書

魏文靖公宅宋端平間公都督江淮理宗賜第吳中有

高節堂事心堂靖共堂讀易亭復親書鶴山書院四

大字賜之即今巡撫治所

王賓詩幾迴除拜到中朝
門逕于今草已饒只有聲

名在人世西山相並獨相高張雨題鶴山書院寂寂
茅堂晝掩門藤陰花氣野池渾情知建鄴青精飯不

到臨卽
白髮孫

蝸廬在城北中書舍人程俱致道所居俱政和間自監
舒州茶場上書論時政不合來吳葺小屋號蝸廬中
有常寂光室勝義齋廬後隙地種竹樹因有菊鳳僊

鷄冠紅莧芭蕉水青等七詠之作

遷居蝸廬有舍僅容膝有門不容車

寰中孰非寄是豈真吾廬不作大耳兒閉關種園蔬
茅簷接環堵無地可灌鋤不作下榻翁一室謝掃除
平生四海志投老河魚枯願從素心人不減南村居
蕭然冰炭外傲睨萬物初坐視蠻觸戰兼忘糟粕書
聊呼赤松子伴我龜腸虛又葺蝸廬吳下四海無廬
著此翁故營松竹儘囊空明知計出栢馬下正擬身
全木鴈中東郭易成生草舍南村先怯卷
茅風向來豪氣今如此敢與元龍較長雄

高參政宅參政名定子蜀人賜第在仰家橋一云在朱

明寺橋後有敬身堂魏鶴山銘

張處士谿居

王禹偁詩雲裏寒谿竹裏橋野人居處絕塵囂病來芳草生漁艇睡起殘花落酒瓢

閑把道衣尋晚照靜攜茶鼎洗春潮長洲懶吏頻過此為愛山園有藥苗

阮狀元宅在南星橋西舊有狀元坊

陳君子宅在閭門陳之奇虞卿所居

鄭虎臣宅在鶴舞橋東居第甚盛號鄭半州四時飲饌

各有品目著集珍日用一卷并元夕閨燈寶錄一卷

皆言其奢侈於饜飫也當宋末殺賈似道於木綿菴
即其人也

企鴻軒在吳縣東昇平橋越人賀方回所居方回名鑄

嘗作吳趨曲能道吳中景物有別墅在橫塘常扁舟

往來其青玉案詞云

凌波不過橫塘路

黃魯直有詩云

解道江南

斷腸句只今惟有賀方回

鍾子充隱居舊志弗載以錢厚所寄詩中藥苗等語推

之恐隱士鍾璇子孫也

詩曰倦倚吳門思沈寥懷人清致滿詩瓢池塘芳草夢初

斷風雨落花魂正銷一百五日寒食節二十四
浦春江朝遙知藥園晚徑斲舍後蘼蕪添綠苗

邊侍郎宅在金獅子巷侍郎諱知白既仕而歸築室於
此

黃端冕宅在聚塢山中有白鹿巖梅谿鹿苑臺端冕名
纓其先建安人直祕閣策之子也

葉少蘊舊宅在鳳凰鄉魚城橋政和中寓布德坊

程正議宅宋程師孟所居在開元瑞光南園之間

太守晏公

贈詩云衣冠雖盛皆僞
寄青鎖僊郎獨我鄉

元魏公宅在帶城橋東公名絳嘗參豫大政引年歸老
知州章岵表為袞繡坊

范龍圖宅在薦冠坊范公名師道

小隱堂秀野亭在城北蘇人多遊飲於此蔣堂有過葉

道卿侍讀小園詩

蔣堂詩秀野亭連小隱堂紅蕖綠
篠媚滄浪下山居士無歸意卻借

吳儂作醉鄉下山
居士道卿號也

信安郡王府在閭丘坊孟忠厚所居有靜寄堂清心亭

萬卷堂等扁皆孝宗御題

成齋在醋庫巷郡人黃雲為鄉先生授弟子經時所名也寧宗在嘉邨大書以賜之雲字景祥時為淮西酒官其子狀元由狀元及第

賢行齋在大雲坊林處所居朱伯原記

賢行齋記德祖少而警敏生數

歲其伯父今天章公嘗獲一鑑背題龍朔德祖在旁曰此唐太帝時所鑄也子中奇之他日諸父有所見問之即對皆與史合孔常父掌揚州學德祖年十七試為諸生冠會神宗初罷尊號坐客或論尊號之所起德祖避席曰宇文周宣帝生號天元唐高宗自稱天皇自是美稱寢多矣常父即取筆札命書之擢為都講辭不受元豐中試太學第一司業博士以謂三舍之置未有此作也厥後試二浙江東漕司嘗在魁

選又用賦舉開封名第五而連見黜於禮部一時諸公幸得之以為功見其失也莫不驚愕嗟惜嗚呼近世以糊名取士雖曰至公其弊至於失才如此可為太息先公太僕當任子德祖以遜其弟碩孺太僕不許德祖即取奏牘以碩孺名上之會有詔任子必以長幼為之序德祖貽書諫官曰某當以廢疾自棄矣是時岑巖起仲子亦推與叔弟德祖聞之諗巖起建請乃得改法碩孺遂得入仕太僕捐館河東德祖號頓幾不勝間關扶護下太行而歸未卒哭葬吳西山所以奉終顯親之事無不自竭鄉閭敬服其平居論議必以帝王之佐為師而頗喜賈誼汲黯諸葛孔明魏鄭公之為人其志可知也

楊和王府在和令坊今竹堂寺其遺址也

范參政府在西河上文穆公成大所居有壽櫟堂其南

有范村以唐胡六子涉海所遇為名中有重奎堂奉
孝宗御筆傍有便坐梅曰凌寒海棠曰花僊茶蘼洞
中曰方壺衆芳禱植曰露雲其後菴廬曰山長具見

公所為詩

壽櫟堂午坐屋角靜突兀雲氣低鴻濛殘
葉颭疏雨孤花側淒風北窻午睡起一笑

萬事空無人共此意苔堦咽微蛩壽櫟堂枕上禪牀
初著小山屏夜久秋涼枕上清繞髻飛蚊妨好睡卧
聽簷雨入池聲范村午坐好風入脩篁槁葉舞而墮
斷續一蛩吟高下雙蝶過踈樾午陰圓靜極成癡坐
老便几杖供慵廢誦弦課蒲團輒易暖困來百骸情
四傍無人聲誰驚短夢破范村雪後習氣猶餘燼鍾
情未濕灰忍寒貪看雪諱老強尋梅慰貼愁眉展勾
盤笑口開直疑身健在時有句飛來賞海棠三絕芳

春隨分到貧家兒女多情惜歲華聊為海棠修故事
去年燈燭去年花又燭光花影兩相宜占斷光風二
月時但得常時妃子醉何方獨欠少陵詩又憶向僊
華夜倚欄花光妍暖月光寒如今跼踖嫌風露且只
銅瓶滿
插着

招隱堂在畫錦坊郡人胡元質給事所居谿堂也堂後
有荷有竹建二堂曰雲錦碧琳其東有榭曰秀野瀕
水對峙三石甚奇乃鎮蜀時所移物也

靜樂堂在烏鵲橋南知郡孔元忠所居樓中儲書萬卷
葉適有詩

歲寒堂在帶城橋東淳熙初都丞徐本中為浙西提刑
偶得元少保故宅葺治之寧宗御題其扁以江東運
副奉祠而歸自號歲寒居士揮麈後錄云徐端益以
右階出仕為瑞安路分都監時曾覲為雙穗鹽場官
與其子本中善覲既用事薦本中於孝宗由是密侍
禁中

萬卷堂侍郎史正志所居在帶城橋南舊有石記為僧
磨毀施氏叢抄云正志揚州人造帶城橋宅及花園

費百五十萬緡僅一傳圃先廢宅售與常州丁卿昆
季僅得一萬五千緡紹定末丁析為四其後提舉趙
汝樵占為百萬倉糴塲

和致堂在九勝巷洛人趙思所居其別業號西園在閭
門之西

萬華堂在資壽寺後藍師稷提刑所居植牡丹至三千
株多於洛中名品後惟勝雲紅存焉師稷字叔誠開
封府人

林樞密宅在烏鵲橋南樞密名希

章氏別業在閭門裏北城下今名桃花塢當時郡人春

遊看花於此後皆為蔬圃間有業種花者

范成大和章秀才北

城新園方遊桃花塢窈窕入壺天碧城當巖岫清灣如澗泉風月欲無價聊費四萬錢雪後春事起紅雲蜂蝶邊又西城如西塞桃花古來多釣艇鰕魚肥前身張志和煙霏幾白鷺風雨一綠蓑清江韻新引清絕勝陽和北城梅為雪所厄凍蘂粘枝瘦欲乾新年猶未有春看雪花祇欲欺紅紫不道梅花也怕寒

閑貴堂在醋坊橋東本蕭氏雙節堂也既為周虎所得

遂易今名後有臺環以古桂數千本名曰凌霜宅東

有地陂陀立亭其上曰已高

其地即九曲琉璃巷

冷副端宅在常熟縣西北叢桂坊

四賢堂在崑山宋孝宗朝李衡為御史以論張說不行
遂致仕時給事中莫濟不書敕直學士周必大不草
制諫官王希呂與衡相繼論奏不報四人同時去國
布衣莊治賦四賢詩以紀之其後衡之孫潛作堂於
家畫四賢之像並祠其中

王忠惠公宅公號抑齋嘉熙中居此有銘

逸野堂在崑山縣治西北宋王僖康國所居僖少遊太學有聲既而歸隱教其從孫葆為名御史其地即十六觀堂基云

李重發隱居在崇明姚劉沙

重發詩松竹一茅廬其間隱者居無營心地靜懶出

事情疎奉母甘蔬食呼童課古書自知生理拙未敢廢耕鋤

棲間堂崑山龔昱立道作陸遊劉過有詩贊之

半隱堂崑山莫仲宣所居顏叔簡有詩又有西園其別墅也韓侂冑當國公閒居十年自號西園居士

曾丞相府在常熟縣西北衮繡坊

范清獻公第在至和塘北舊有石刻范府界三字

衛文節公第在石浦有石累山今尚存又有後樂堂景

獻太子書扁友順堂寧宗書扁

甬堂郡人鄭起潛尚書所居在天心橋又有立菴皆理
宗御書其扁

喜廉堂崑山陳昌世作昌世自信守召為尚書郎入對
理宗有一廉可喜之語因名其堂喜廉在崑山

鄭大資府在崑山通德坊舊有石刻鄭府界三字

傳清堂崑山陳令君明復所構程丞相元鳳書扁取祖

父清白相傳之義

嘉樹堂在嘉定縣西北二十里强恕齋作强初自汴徙

吳先世手植樹如皂莢二百年物也楊廉夫記

嘉樹堂記

吳之陳所有隱君子家為恕齋强氏其先八世祖贊
自汴居吳遂為吳人手植嘉木一本在中庭俗名皂
角者其根祇貫堂背枝葉輪囷蔽風暑實銚然資深
雪服食之用色理堅緻而不為螻蟻所近其越歲已
二百餘幹益碩大枝葉華實益茂美於是强氏子孫
繁衍亦且二伯餘指而有食君之祿者矣予與恕齋

為昆弟交過其家見其樹而知其先德之覃于后者
未已也恕齋持觴為余壽且請記予聞諸傳李孫宿
有嘉樹為韓宣子所美吾不知其樹何樹也宿曰敢
不封植此樹以忘角弓之詩遂賦甘棠夫季氏子孫
為魯公室斧斤樹之封植其敢比德召南哉宣子蔑
魯媚季其得果名嘉樹乎嘗論世澤於甘棠之後若
孔子之檜下為田氏之荆王氏之槐是已此非其子
孫一時封植之勤蓋一本之深百世之下固若有神
明護持之力在焉吁非偶然也諗矣孔子之檜吾不
得而見之得見如田氏王氏亦可已若今強氏之植
非可續王氏田氏之后者乎非所謂嘉樹而有光于
傳者乎抑聞前人所種其收于後後人所培又以固
前人之本恕齋伯仲皆清修好學尊德而尚義周人
之急甚至於捐金粟以助國家荒政利祿之心未嘗
入焉朝廷業已表其宅里其於樹所培者厚矣前人
植之後人培之一元之氣雖貫百世而可也豈直八

世十世而已哉後恕齋之後者尚以余言勉之於是乎書為強氏嘉樹堂記

石澗書隱石澗名琰字玉吾號石澗所居在今府學西

中有詠春齋盟鷗軒端居室皆玉吾孫貞木所作貞

木孫振宗又作九芝堂今皆廢為菜圃

貞木詠春齋記儒有母追

以為冠逢掖以為衣沈酣黃虞泳游姬孔其所居齋廬數筍席據梧几函文中緼朱絃瑟一有客過其閭式之曰是南園之居也乃下而入謁先生竢于垣之扉高柳婀娜拂人衣裳黃鳥相上下或翔而萃或躍而鳴泠然有醒乎耳焉晉于靡之闕豐草披靡嘉花苾芬白者朱者絢且綺者秀綠以籍之甘寒以膏之灑然有沃乎目焉升于堂之堦客主人拜稽首琬玕璫如跪起曄如為席坐東西向條風時如水來煦容

而煥體冲然有融乎心焉先生乃援瑟鼓之為之賦
考槃客曰裕哉其順處乎賦伐木曰諒其同人乎賦
早麓之三章曰道其至矣夫不圉乎人游乎天瑟且
希客起再拜且觴以頌之曰維本始之萌翕闔闢網
緇或旁礴以地或昆侖而天索籥衆萬芸芸芬芬騫
而于雲泳而于川何物何我陶焉一春弁而五六士
州而六七人浴沂以嬉風雩以歸而木泐泐而樂怡
怡匪列御風匪周觀魚造物者為徒而曾哲子與居
舍曰詠春其曷以名先生之齋廬者哉端居室記端
居室者山人俞楨讀書寢處之所也楨幼尚澹泊於
世利紛華無所嘗讀書必冥心端坐以求其理趣
因歎曰學所以適用也不仕則無以及人乃習舉子
業將以明經取科第既而幡然改曰學為已知在人
何以投試為哉於是悉棄所業潛心象象一室之間
左圖右書莫然外慕乃題其顏曰端居夫學須靜也
惟靜可以觀萬化之妙端居一室以拓充吾方寸焉

雖天之高也吾不知其為高地之大也吾不知其為大至於山河之崇深吾亦不知其崇深也反而觀之以吾眇然之身而處乎天地之內涵融自得浩浩焉混混焉不獲其人不見其身會彼之萬歸此之一可默也而不言也室云乎哉因疏斯語於壁以識名茲室之意盟鷗軒記旁蘇城郡之西南際野水有林木焉其廣袤不知頃畝空闊葱蒨遊者自能道海鳥從而翔集之林木不見層軒數楹者山人俞損之居也山人自顏其扁曰盟鷗須予記鷗不待盟也盟鷗鷗將逃焉人惟其忘機也故鷗從之機事一萌鷗舉不暇邀而盟之鷗豈留哉況盟非美事刑牲歟血要明神而誓之以合其交初非有誠信也口血未乾從而背之生隙長亂莫甚於此君子之有盟夫豈得已也且夫有機則疑機忘何疑疑而後盟不疑何盟盟何補於疑哉忘其機而已矣吁山人之盟鷗寓言也山人之不得已也吾聞山人於世故泊如也其何利

於鷗鷗出沒滄波萬里莫馴亦何求於山人鷗從山
人之忘機山人忘其機而從鷗機交相忘何疑不疑
何盟孔子云吾非斯人之徒與而誰與山人學孔子
者也其盟鷗豈得已哉使世可盟豈盟鷗也鷗盟則
舉世之人皆不足與盟矣世皆不足與盟鷗何辭焉
匪鷗則盟鷗將乞盟鄭元祐詩先生註易隱南城激
石松風荅澗聲式玉式金王度在一寒一暑歲功成
要參未盡須心悟洞釋羣疑貴理明薊屋見星元是
畫褰瀛挾地可無程義精詎忍辭捫舌樂大何妨枕
曲肱雨露每滋庭草綠雲霞不碍晚山橫成林詎舍
千草木求友難忘百嘯鸞歲月
推遷陳跡在啓蒙長憶酒同傾

城南佳趣堂在虞山東之芝谿上邑人虞子賢嘗得朱
晦菴和張廣漢忠獻城南禱咏真跡遂築堂以居番

陽周伯琦題扁曰城南佳趣

秦約記畧曰虞山之東有地曰芝谿虞子賢世

居焉子賢博雅好修家有先世所藏古今法書名畫
兵後有得徽國朱子和廣漢張忠獻城南襍咏真跡
一卷蓋自是建中還新安而作也於宅之西構堂三
楹松竹花卉之類環列左右宛若山林然顏曰城南
佳趣番易周伯溫題其椽而為之記倪瓚詩天濶海
漫漫崑山望眼寬桃源迷晉世松樹受秦官雨蘚鹿
跡遍霜梧鸞影寒封題
數行字聊問竹平安

壽樸堂在綺川戶部侍郎莫禮作方希直為記

漫莊在邳村范志作毗村處士顧禧之所居也禧棄官

高隱鄉人貴重之

章憲詩何許明人眼松間見古堂
泉聲到渠几山影覆繩床愛酒陶

元亮聽蛙孔德璋紛紛
戰蠻觸五壑信難忘

鄭所南宅在樂橋東條坊巷

王賓詩自從宋鼎被遷移此宅飄零棄與誰人問先

生垂泪答國亡何用戀家為

殷強齋宅在太倉武陵橋下扁其樓居曰春水船即其

讀書處也

範軒林大同所居軒中有左右記大同自作也

耕漁軒在光福徐良甫作良甫有文學所交皆名士為

題詠者甚多

耕漁軒銘唐肅軒之幽釋耒而休其樂也由由軒之泰投竿以愒其樂也洩洩

朝華其宮莫或易而翁昨鼎其食今或爨而豁勿舍
予田勿忘予筌于以老予軒倪瓚予既為良甫友契
作耕漁軒圖復為之詩鄧山之下其水舒舒林廬田
園君子攸居載耕載漁爰讀我書唐虞緬邈愴矣其
悲栖遲衡門聊得我娛敬慎誠篤德罔三二四勿是
克三益來萃彼溺于利我以吾義彼棄懦頑我以仁
智匪今之同惟古是嗜虛徐消搖隱約斯世周砥夙
存邁往志結茅依山澤不辭沮溺勞更慕濠梁逸既
畊亦以釣四體欣覽息新稼登塲丘嘉魚薦晨夕烝
嘗無足患喜復留我客野田荒煙翳平湖激景寂開
檐睇孤雲窅然無遺跡緬惟高世士何嘗異今昔識
達理自周情恬慮非易念子屬紛糾抗俗願有適東
帶趨城府愧予尚促戚百年誠草草會當從茲役高
啓朝聞孺子歌暮聽梁甫吟豈無滄洲懷亦有畎畝
心昔賢在泥蟠終當起為霖釣獲谿上璜鋤揮瓦中
金茲世方喪亂伊人邈難尋既迷煙波濶復阻雲谷

深嗟我豈其偶聊將學幽潛唯子是同抱相期清渭陰張羽之子住銅坑人傳好事名如何同甲子翻遣昧平生野岸風中釣湖田雨後耕秋天漸涼冷或可赴前盟徐賁荷揅喜逢春雨鳴榔又近黃昏誰道南陽渭水不似湘江鹿門○門泊陶朱歸棹家往張翰故鄉霜落鱸魚出水秋晴嘉穀登場

曹勉之隱居在吳江勉之名謹國初本學訓導所居有

水竹遂名其居

俞焯記洪範五行其一曰水其所以相生者不曰金邪然浮天載地水之

為物至巨也世言河源與天漢接所以洩於尾閭洩於沃焦者抑豈五金所能生哉惟蒸而為雲霈然以雨也實乾以氣化之故乾為金而凡火日形氣麗於木者多由金光而變幻之雷電亦然耳故金在鎔化而為水水非火所以制範而合之非如水火土木著壤相也植物在震曰蒼筤竹一切草木率由子種而

生惟竹虛中而有筠驟長而不積於漸抱籜而乘氣
猶胎也走根而生不擇地也雷以聲之盤結而族處
之區別於草木之中其性其情為化木之走者受氣
於天者正故貫四時而不改柯易葉也受命於地也
獨故既斬而不復萌焉無求生以害仁也移根必南
枝也凝陰而不受暑也義也謂其乘震長男之氣一
以清涼而卻俗塵者竹耳勉之曹君以之而名其居
所以得凡而止者德日以新體聖之清如見成湯與
夷齊也倪瓚詩吳下人家水竹居俞公染翰笑談餘
記文固已瀾翻甚嘯詠還當雨霽初篇什謾勞陳組
繡園池無復有禽魚只今蕭
散南湖土種玉流清孰侮予

老相公衙在干將坊內元參政周伯琦所居伯琦使吳
被留張氏構此館之衙極壯麗今為一武官宅人猶

以當時稱之

玉山草堂在崑山元顧仲瑛所居有小蓬萊芝雲室可
師齋讀書舍來龜軒拜石壇碧梧翠竹館種玉亭湖
光山色樓百花坊其總名曰玉山草堂仲瑛好文喜
客楊廉夫諸人多遊其家國初從其子元臣遷鳳陽

楊維禎玉山佳處記崑隱居顧仲瑛氏其世家在崑
之西界谿之上既與其仲為西第又稍為園池別墅
治室廬其中名其前之軒曰桃源中之室曰芝雲東
曰可詩齋西曰讀書舍後之館曰碧梧翠竹亭曰種
玉合而稱之則曰玉山佳處也予抵崑仲瑛氏必居
予佳處所按輿志崑山縣華亭陸氏祖所寔生機雲

時人因以玉出崑而名山崑邑山本號馬鞍出奇石似玉煙雨晦冥時有佳氣如藍田焉故人亦呼曰玉又曰崑而仲氏之居去玉山甚遠奚以佳名哉山之佳在去山之外者得之山中之人未知也如唐之終南隱者與司馬道人指山之佳身固在山數百里之外也雖然終南之嘉終南之隱者未知也借嘉為捷仕之途千古慙德至于今山無能掩焉若仲氏之有仕才而素無仕志幸有先人世祿生產又幸遭逢盛時得與名人韻士日相優游於山西之墅以琴尊文賦為吾弗遷之樂則玉山之佳非仲瑛氏弗能領而有之與終南隱者可以辯其佳之誣不誣矣

鄭文康宅在崑山縣中平橋文康有學行中進士以病不出仕所著有平橋稿世業醫藥不二價

葉文莊第在崑山內有策竹堂因以名其集

徐武功伯宅在吳縣治北公自謫所歸號天全翁建堂

曰天全

陳僖敏公宅在府治北鐵瓶巷內公以師保致政歸治第作小園闢隙地得蔡君謨所書畫錦堂石碑復有芝產於堂柱間人以是為公完名全節之徵云

韓都憲宅在葑門內公既貴歸吳治宅而居谿流環遶

宅東有園作堂於其上曰葑谿草堂

葑谿草堂聯句會者五人徐武

功伯有貞祝大參顥馮副憲定劉憲僉珏及都憲公
蔚谿古無名得名自茲始作堂惟一韓有貞覽景具
諸美山川何蔚然靈秀實鍾此顥東連滄海濱西接
太湖涖定獅峯南面蹲虎阜北窻峙珏波光動園林
野色到城市顥池深魚影晦林密鳥聲喜珏天淵飛
躍間上下契心理有貞往古與來今左圖而右史定
豈惟賢王樂亦有嘉賓止珏廣席羅珍羞飛觴戰壺
矢雍美芼松水鱸果薦華陽李有貞獻酬心孔歡歌
詠情未已嗟予苦衰遲避俗隱桑梓羣公忽枉駕感
激欲輕死沉辱聯佳章足與風雅比鬪鷄不須言石
鼎何足齒行當勒貞
珏傳播千萬禩

積善堂常熟徐敏叔作吳思菴記敏叔治家有法以其

子恪為都御史贈如其官

九瑞堂贈都憲章珪所建在常熟縣北虞山之麓珪宣
德間受薦為名御史生四子俱登第祥瑞疊見故名
其堂曰九瑞堂

姑蘇志卷三十一

欽定四庫全書

姑蘇志卷三十二

明 王鏊 撰

園池

晉辟疆園自西晉以來傳之池館林泉之勝號吳中第

一辟疆姓顧氏晉唐人題詠甚多

陸羽詩云辟疆舊林園怪石分相向

陸龜蒙云吳之辟疆園在昔勝槩敵皮日休云更葺園中景應為顧辟疆宋張伯玉云丁公門館辟疆園放蕩襟懷今莫知遺跡所在考龜蒙之詩則在唐為水石間

任晦園亭今任園亦不可攷矣

高啓詩江左風流遠園中池館平賓客已

寂寞孤兔自縱橫秋草猶故綠春花
非昔榮市朝亦屢改高臺能不傾

陸山人樓亭見儲光義詩廣異記云蘇州山人陸去奢

亭子即戴顓宅也

光義詩暮聲雜初鴈夜色涵早秋
獨見海中月照君池上樓山雲拂

高棟天漢入雲流不惜
朝光滿其如千里遊

孫園今不知所在

元微之寄樂天詩孫園虎寺
隨宜看不必遙遙羨鏡湖

任晦園池晦嘗為涇尉歸吳作圃皮日休云有深林曲

沼危亭幽砌之勝蓋晦得辟疆園以為宅也

皮日休
詩任君

恣高放斯道能寡合一宅閑林泉終身遠囂雜嘗閑
佐浩穰散性多僂偕歛爾解其綬遺之如棄鞵歸來

鄉黨內却與親朋洽開溪未讓丁列第亦稱甲入門
約百步古木聲霎霎廣檻小山欹斜廊怪石夾白蓮
倚欄梢翠鳥緣簾押地勢似五瀉巖形若三峽猿眠
俱媪舂鳧食時啖啖撥荇下文竿結藤紫挂戟門留
盤樹客壁倚栽花鋪度歲止褐衣經旬唯白恰多君
方閉戶顧我能倒屣請題在茅棟留坐於石榻覓從
清景逼衣任煙霞裊階墀龜任上枕席鷗方狎沼似
頗黎鏡當中見魚唼杯杓悉杉瘤盤筵盡荷葉閑斟
不置罰閑奕無爭劫閑日不整冠閑風無用簔以斯
為思慮吾道寧疲滿袞衣競維綵鼓吹爭鞞鞫欲者
解擠排詬者能詆講權豪暫翻覆刑禍相填壓此時
一圭竇不肯饒閭闔有第可棲息有書可漁獵吾欲
與任君終身以斯恆陸龜蒙吳之辟疆園在昔勝槩
敵前聞富脩竹後說紛怪石風煙慘無主載祀將六
百草色與行人誰能問遺跡不知清景在盡付任君
宅却是五湖光偷來傍簷隙出門向城路車馬聲輾

轢入門望亭隈水木氣岑寂犴牆繞曲岸勢似行無
極十步一危梁乍疑當絕壁波容澹而古樹意蒼然
僻魚驚尾半紅鳥下水全碧斜來島嶼隱恍若瀟湘
隔雨靜挂殘絲煙消有餘脈竭來任公子擺落名利
役雖得祿代耕頗愛巾隨策秋籠走遁鶴夜榻戴顓
客說史足為師譚禪差作伯君多鹿門思到此情便
適偶蔭桂堪帷縱吟苔可席顧余真任誕雅遂中心
獲但喜醉還醒豈知月尚白甘閑在雞口不貴封龍
額即此自怡神
何勞謝公屐

褚家林亭松陵倡和集云在震澤之西范志云當在松

江之傍今吳中褚姓尚多亦有登進士科者

白居易詩聞健

朝朝出乘春處處尋天供閑日月人借好園林漸以
狂為態都無悶到心平生身得所未省似而今皮日

休廣亭遙對舊娃宮竹島蘿溪委曲通茂苑樓臺低檻外太湖魚鳥徹池中蕭疎桂影移茶具狼藉蘋花上釣筒爭得共君來此住便披鶴氅對清風陸龜蒙一陣西風起浪花遶欄干下散瑤華高窓曲檻仙侯府卧葦荒芹白鳥家孤島待寒疑片月遠山終日送餘霞若知方外還如此不要乘秋上海槎

凌處士莊

韋莊詩云一簇林亭返照間門當官道不曾關花深遠岸黃鶯鬧雨急春塘白鷺閑載酒

客尋吳苑寺倚樓僧看洞庭山怪來說得仙中事新有人從物外還

東墅又名東莊與南園皆廣陵王元璩帥吳時其子衙內指揮使文奉所勅經營三十年極園池之勝奇卉異木及其身見皆成合抱又累土為山亦成巖谷晚

年經度不已每燕集其間任客所適文奉跨白驃披
鶴氅緩步花徑或泛舟池中容與往來聞客笑語就
之而飲其好事如此

南園祥符圖經云在子城西南有安寧廳思立堂清風
綠波迎仙等三閣清漣涌泉清暑碧雲流杯沿波惹
雲白雲等八亭又有榭亭二就樹為榱柱及迎春百
花等三亭西池在園廳西有龜首旋螺二亭續記云
廣陵王帥吳因治南園為島嶼峯巒出於巧思錢氏

去國此園不毀祥符中知州秦義葺之以會寮吏館
使朝貴皆為賦詩參知政事郡人丁謂為序時景靈
宮購求珍石郡中亦於此取貢京師其間臺榭歲久
摧圯呂濟叔嘗作熙熙堂厥後守將亦加修葺今所
存之亭僅有流杯四照百花樂豐惹雲每春縱士女
遊覽先是長洲令王禹偁常攜客醉飲賦詩謂云天子優賢
似有唐鏡湖恩賜賀知章他年我若功成後乞與南園作醉鄉大觀末蔡京罷相欲
東還詔以園賜之京詩云八年帷幄竟何為更賜南園寵退歸堪笑當年王學士功名

未有便吟詩

續志云南園昔甚廣袤異木奇石多為朱勔

取進獨一松盤根大不可移而止今府學後一方之地亦故址也猶有清流崇阜可以彷彿當時之勝蜀人高氏嘗得一隅經營之而流杯出焉因作醉鄉亭

以倣古

羅隱南園詩搏擊路終迷南山且灌畦敢言逃俗態自是托幽棲葉長春菰潤科圓早薤

齊雨沾虛檻冷雲壓遠山低竹好還成徑桃夭亦有蹊小窓飛野鳥閑籠養醯雞水石心逾遠雲霄分已睽病憐王猛畚愚笑隗囂泥澤國潮平岸江村柳覆堤到頭乘興是誰手好持攜蘇舜卿西施臺下見名園百草千花特地繁欲問吳王當日事後來桃李若為言梅摯長洲茂苑足珍材剝買前山活翠栽客士

不疎承帝力幾多臣節共安來。長洲茂苑占幽奇。
巖榭珍臺入翠微。園李露濃三色秀。徑桃烟暖一香
飛。月臨夕樹烏頻遶。風揭珠簾燕未歸。弭蓋暫歡成
結戀。斜陽憑檻獨依依。胡宿一遍芳菲欲滿林。回塘
過雨曉來深。紅粧珠珮交花影。白馬春衫度柳陰。
向老追攀多強意。隨時風物但驚心。眼前百事輸年少
猶解因君放浪吟。周元明。燭爛花時錦繡張。無端下
馬繫垂楊。山亭水閣笙歌地。合與行人作醉鄉。程俱
王子池臺迹已荒。年來華構壓高岡。長林不礙千山
月。老幹猶含九夏霜。便覺平泉冠東洛。還依綠水記
南塘。蝸廬却喜通幽徑。岸幘時來一嘯長。成廷珪和
周伯溫參政九日南園燕集二首。步履巉巖若跨鰲。
望中詩興與秋高。西山拄笏東山屐。右手持杯左手
螯。返照入湖明塔影。斷雲將雨過林皋。松間飲散歸
來晚。金粉霏霏濕錦袍。范相南園五百秋。重來訪
古轉多愁。啼烏樹老臺空在。飲馬池荒水不流。芹泮

好從多士樂桂叢誰賦小山幽諸公高會詩如錦授
簡安能接勝遊高啓君不見平樂館古城何處寒雲
滿君不見奉誠園荒臺無縱秋草繁白日沈山水歸
海寒暑頻催陵谷改皇天大運有推移富貴於人豈
長在請看當年廣陵王雙旌六纛何輝光幸逢中國
人多故一家割據夸英雄園中歡游恐遲暮美人能
歌客能賦車馬春風日日來楊花吹滿城南路疊石
為山引泉為池辟疆舊園何足奇經營三十年欲令
子孫永保之不知回首今幾時繁花掃地無復遺門
掩愁鴟嘯風雨種菜老翁來作主空餘怪石卧池邊
欲問興亡不能語春已去人不來一樹兩樹桃花開
射堂踰圃俱青苔何須雍門琴但令對此便可哀人
生不飲胡為哉
生不飲胡為哉

張氏園池亦南園故地也紹興間侍郎張幾仲得之今

山亭猶扁惹雲池塘猶扁清漣存故實也堂側有凌霞閣奉其父循王像四時飾以真服

滄浪亭在郡學之南積水彌數十畝傍有小山高下曲折與水相縈帶石林詩話以為錢氏時廣陵王元璩池館或云其近戚中吳軍節度使孫承佑所作既積土為山因以瀦水慶厯間蘇舜欽子美得之傍水作亭曰滄滄歐陽文忠公詩云清風明月本無價可惜只賣四萬錢滄浪之名始著子美死屢易主後為章

申公家所有廣其故地為大閣又為堂山上亭北跨水有名洞山者章氏併得之既除地發其下皆嵌空大石人以為廣陵王時所藏益以增累其隙兩山相

對遂為一時雄觀建炎之難歸韓蘄王家

蘇舜欽滄浪亭記予

以罪廢無所歸扁舟南遊旅於吳中始僦舍以處時盛夏蒸燠土居皆褊狹不能出氣思得高爽虛闊之地以舒所懷不可得也一日過郡學東顧草樹鬱然崇阜廣水不類乎城中並水得微徑於雜花脩竹之間東趨數百步有棄地縱廣亟五六十尋三向皆水也缸之南其地益濶旁無民居左右皆林木相虧蔽訪諸舊老云錢氏有國近戚孫承佑之池館也坳隆勝軌遺意尚存予愛而徘徊遂以錢四萬得之構亭

北碕號滄浪馬前竹後水水之陽又行無窮極澄川
翠幹光影會合於戶軒之間尤與風月為相宜予時
榜小舟幅巾以往至則灑然忘歸觴而浩歌踞而仰
嘯野老不至魚鳥共樂形骸既適則神不煩觀聽無
邪則道以明返思向之汨汨榮辱之場日與錙銖利
害相磨戛隔此真趣不亦鄙哉噫人固動物耳情橫於
內而性伏必外寓於物而後遣寓久則溺以為當然
非勝是而易之則悲而不開唯仕宦溺人為至深古
之才哲君子有一失而至於死者多矣是未知所以
自勝之道予既廢而獲斯境安於沖曠不與衆驅因
之復能見乎內外失得之源沃然有得笑傲萬古尚
未能忘其所寓故用是以為勝焉舜欽滄浪詩一逕
抱幽山居然城市間高軒面曲水脩竹慰秋顏迹與
豺狼遠心隨魚鳥閑吾甘老此境無暇事機關滄浪
觀魚瑟瑟清波見戲鱗浮沈追逐巧相親我嗟不及
羣魚樂虛作人間半世人滄浪靜吟獨遠虛亭步石

破窗二子逢時猶死餓三閭遭逐便沈江我今飽食
高眠外唯恨澄醪不滿缸滄浪懷友滄浪獨步亦無
悵聊上危樓四望中秋色入林紅黯淡日光穿竹翠
玲瓏酒徒漂落風前燕詩社凋零霜後桐君又鬢來
還徑往醉吟誰復伴衰翁獨步花枝低斂草色齊不
可騎入步時宜時時攜酒只獨往醉倒唯有春風知
又初晴遊夜雨連明春水生嬌雲濃淡弄微晴簾虛
日薄花竹靜時有乳鳩相對鳴歐陽修子美寄我滄
浪吟邀我共賦滄浪篇滄浪有景不可到使我東望
心悠然荒灣野水氣象古高林翠阜相回環新篁抽
筍添夏景老桄亂發爭春妍水禽閑暇事高格山鳥
日夕相啾喧不知此地幾興廢仰視喬木皆蒼煙堪
嗟人迹到不遠雖有來路曾無緣窮奇極怪誰似子
搜索幽隱探神仙初尋一逕入蒙密豁見異境無窮
邊風高月白最宜夜一片瑩淨鋪瓊田清光不辨水

與月但見空碧涵漪漣清風明月本無價可惜祇賣
四萬錢又疑此境天乞與壯士憔悴天應憐鵝夷古
亦有獨往江湖波濤渺翻天崎嶇世路欲脫去反以
身試蛟龍淵豈如扁舟任飄兀紅蕖綠浪搖醉眠丈
夫身在豈長棄新詩美酒聊窮年雖然不許俗客到
莫惜佳句人間傳胡宿竄迹本無罪羈窮向此忘野
煙含悵望落日滿滄浪亂草荒來綠幽蘭死亦香楚
魂招不得秋色似瀟湘胡珵昔聞滄浪亭未濯滄浪
水先賢眇遺跡壯觀一何侈飛橋跨水未巨浸拆胡
壘糟床行萬甕綠牆周數里廢興固在天庶用觀物
理緬懷嘉祐世周道平如砥相君賢相君子美東南
美如何一網盡禍豈在故紙青蠅變白黑作俑茲焉
始所存醉翁文垂耀信百世無忌角弓詠嘉樹猶仰
止同來二三子感歎咸坐起縹緲醕新汲毀譽均一
洗忽逢醒狂翁一別垂二紀雋哉老益壯論事方切
齒我欲裂絳幔推着明光裏安得上天風吹落君王

耳梅虎臣寄題滄浪亭聞買滄浪水遂作滄浪人置
亭滄浪上日與滄浪親宜曰滄浪叟老向滄浪濱滄
浪何處是洞庭相與鄰竹樹種已合魚蟹時可緝春
羹茱白菰夏鼎烹紫蓴黃柑摘霜晚香稻炊玉新行
吟招隱詩懶戴醉中巾憂患兩都忘還往誰與頻昨
得滁陽書語彼事頗真曩子初去國我勉勿迷津四
方不可之中土百物淳今子居所樂豈不遠埃塵羸
飾嗟太伯結客非春申莫與吳俗尚吳俗多文身蛟
龍刺兩股未變此遺民讀書本為道不計賤與貧當
須化閭里庶使禮義臻劉敬觀滄浪亭石感而有作
蘇君在朝人不知蘇君既没人悲之流風遺書見稱
道高文大句爭提撕壁間草隸亦不置剥苔堆立無
棄遺乃知死不與人共利害而後不為時所疑滄浪
亭空卉木老古石蒼蒼顏色好無脛猶能千里來致
身忽在都門道帝都王侯好事多相看自悔取不
早君不見吳興長史春襴衫閉門抱恨長枯槁

梅都官園在府治西祝樵野錄云聖俞晚年謝事卜築
滄浪之傍與子美相鄰二公一時名勝日夕往還酌
酒賦詩相得甚歡今猶稱其地為梅家園

隱圃在靈芝坊蔣樞密堂所居堂兩守蘇謝事因家焉
自號遂翁圃中有水月庵烟蘿亭風篁亭香巖峯古
井貪山等景自賦隱圃十二詠宅南溪上結宇十餘
楹名溪館及築南湖臺於水中亦皆有詩皇祐間芝
草生於溪館知州李仲偃集賓僚賦詩為壽因立靈

芝坊胡宿撰溪館記

隱圃雅得菟裘地清宜隱者心
綠葵才有甲青桂漸成陰獨曳

山屐往無勞俗駕尋湛然常寂處水月一庵深溪館
二首年來納組去林下得身還泚泚清流處童童碧
樹間淵魚樂且靜庭鶴壽而閒粗有淮安趣誰同賦
小山○野意本自遂茲溪稱獨醒雲蘿環靜室水石
照踈樗殺竹編書古紉蘭作佩馨王通昔不偶時亦
坐汾亭南湖臺三首危臺竹樹間湖水伴深閒清淺
採香徑方圓明月灣放魚隨物性戴石作家山自喜
歸休早全勝賀老還○峴榭水中央茲為隱遯鄉小
園香寂寂一派曉泱泱烟草碧彌岸霜桃紅壓牆鴟
夷儻居此必未入滄浪○水次揭危亭烟堤四面平
栽蘆延宿鷺種柳待啼鶯雪霽清流漲
風來夜艇橫輕肥莫臨顧我老懶逢迎

徐都官山亭在胥門外都官名祐郡守蔣希魯公為作

七石詩時杜祁公亦有詩其卒章云上刻希魯詩英
詞何縹緲此出於蔣之奇跋語之奇希魯公姪也

就隱在華山郡人張廷傑漢卿所葺紹興間漢卿自靖
州推官歸營此搜奇選勝垂三十年瞰池初亭因阜
立室遂為一時絕境有天池庵臨賦亭綠龜池流惘
亭泓玉釣灘綠淨亭更好亭宿雲庵獨秀亭繡屏不
夜關大石屋小石屋花島俛首巖浮槎橋龜巢石翠
壁釣雲臺雲關張公巖觀音洞石鼓月觀瞿石集僊

壇龜甲井瑞澗柳洲曲水流觴等處而天池為第一
且繪為圖士大夫多賦之周益公遊山記云漢卿既
得華山營墓就隱日課童僕刈剔巖竇疏導泉源負
山厓初亭榭環以佳花美木四時皆有奇觀費益不
貲為吳門絕景然山石麤礪殊乏秀潤耳

復軒在吳縣之黃村處士章憲作謂葺先人之廬治東
廡之軒以貯經史百氏之書名之曰復以警其學其
後圃又有清曠堂詠歸清祕遐觀三亭以慕古賢各

有詩

復軒記其歌云洞視兮八荒了無物兮往無旁
往古來今兮無際起復代謝兮不失吾常復乎

復乎吾所寓兮廣莫之野而無何有之鄉清曠堂吾
慕仲公理卜居樂清曠茲焉愜吾願名堂以自況我
無適俗韻且乏食肉相何許寄吾生棲遲窮巷境
幽有經行心遠無得喪從容大化中信是羲皇上詠
歸亭吾慕曾夫子舍瑟言所志所志非為邦獨契聖
者意莫春春服成從我才一二風乎林岫間所樂有
餘味邈矣千載上神交得冥契當知結駟非不易窮
閭是清秘亭吾慕韓昌黎文章妙百世體物語尤工
賦竹跨清閭唯我獨好之則亦有深意虛中可受道
貫時無險易復若魏文貞直節無嫵媚伊余清閨中
賞翫有遺味遐觀亭吾慕陶靖節處約而平寬涉園
自成趣矯首復遐觀我亦散遊目俛笑天地間雲煙
自舒卷湖嶺相回環永與形役謝豈
有俗慮干想象斜川游千載乃相關

臞菴在吳江縣松江之濱王份營此以居園江湖以入
圃柳塘花嶼景物秀野名聞四方園中有與閑平遠
種德山堂四堂煙雨觀橫秋閣清風臺鬱莪城釣雪
灘琉璃沼臞翁澗竹廳龜巢雲關纈林楓林等處而
浮天閣聚遠樓為最勝總為臞菴份字文儒以特恩

補官為大治令遂歸老焉一時名公題詠甚多

徐作開菴

藜莧幽入室丘園隱者居一原青障合萬木綠陰疎
手把歸田賦腰懸種樹書桑麻連畛秀網罟入溪魚
呂本中伊洛富山水家有五畝園花竹遠瀍澗不讓
桃花源清時足真賞戶門開層軒一朝風塵暗故家

希復存莽蒼走萬里始及吳市門菴廬據形勝水壺
貯乾坤亭榭着仍穩不見斧鑿痕主人更超邁雲夢
八九吞植杖邀我坐笑語清而溫坐令車馬客稍識
山林尊十年老朝市漸覺兩目昏求田與問舍姑置
不復論但願從我公不使世諦渾蘇庠王郎耀菴摩
詰詩煙花繞舍江繞籬石渠東觀了無夢筆床茶竈
行相期古人已往不可作甫里顧有今天隨東隣蟹
舍肯著我請辦蓑笠懸牛衣浮天閣耀菴主人天與
閑回欄飛閣臨滄灣晴波渺渺鴈行落坐見萬頃穿
雲還百年有底付鳥翼未暇著脚鴛鴦間徑須呼酒
澆磊莫遣瞑色霾煙鬟○玉蟾飛入水晶宮萬頃
琉璃碎晚風詩就雲歸不知處斷山零落有無中○
秋落空江動碧虛荻蘆洲渚雁飛初我來欲訪鷓鴣夷
子為掛西風十幅蒲平遠堂柳外西風六幅蒲野塘
睡鴨對春鋤如何喚得王摩詰畫作江山煙雨圖○
寒蘆浙浙催秋晚浦雨冥冥憶去年他日未埋黃土

陌為君重賦補亡篇草堂笛卧松江明月袞披笠澤
歸雲若道清宵快活王侯何事如君王鉉全家高隱
白雲關事不縈懷夢亦閑欵乃交撐漁市散隔江城
郭是人間向子諶僊翁五十鬢猶青高卧柴門晝亦
扃茅舍已忘鍾鼎夢蒲輪休過薜蘿亭陰森門巷先
生柳寂寞江天處士星晚歲田家農事了閑抄甯戚
相牛經沈與永地控三州界池開十丈蓮桑麻無杜
曲松菊有斜川別浦歸帆遠他山晚照妍江湖春水
濶幽興白鷗前程子山待月凝雲館垂竿釣雪灘虛
窻搖冷翠傑閣聲高寒籠養千齡鶴鑪燒九轉丹不
須論許事心目自清閒○壁上煙蘿子窻前鴻素書
短籬開窈窕嫩竹轉扶疎世事霜前葉聲名澗底樗
柴桑陶靖節日暮荷歸鋤何稱多羨王居士心閑事
事幽山從天未見江近枕邊流春圃千葩秀霜林百
果收更能窮物理濠上看魚遊○地古松江勝為園
不種瓜幽深清磬響高下石欄斜花蜜蜂隨蝶林深

雀啁此勝如摩詰畫不是季鷹家○柳外長虹卧江
邊小帘圓水搖千嶂影窻納五湖天隔岸誰家園開
帆何處船非開臺榭好此地最堪憐○霜落川原淡
風高木葉丹雲垂千頃白月墮一江寒禮佛因成塔
焚香旋築壇竹聲過小院雜珮響珊珊○沙暖鴛鴦
困江寒翡翠愁紅蓮秋歷短懼晚夷猶處世長無
累端居百不憂時時明月下橫笛倒騎牛僧道舉竹
裏蓬茅掩棘扉主人詩瘦帶寬圍種成苜蓿先生飯
製就芙蓉隱者衣柳絮春江魚婢至荻花秋水渚雁奴
歸小溪短艇能容我先向溪隈築釣磯○谿南谿北
繞清漪舍後舍前圍短籬九九算來成底夢休休歸
去復何疑添丁見客走賒酒阿買能書供賦詩丘壑
政非公子事綺紈當預少年知李彌正勞車發危坂
勸艘失飛湍滔滔龍馘子疾走殊未闌鶴僊擺名宦
結廬松江干笑拍萍風浮瞬視草露溥圖川不愧輞
序谷寧先盤門豈俗駕拒室無哀箏彈按行松菊間

澹然有餘歡蓮巢衆香聚浮天百憂寬秋光斂洲渚
暮翠籠峯巒我來挾良朋道故盟未寒緬顏仰孤標
耐久同蒼官終當役薪水刀圭却衰殘陳棧季鷹雅
志本江湖胡為入洛誠計疎一盃蓴羹入歸夢歲晚
僅飽松江鱸何如王郎十畝宅一生江頭枕江碧西
風落日弄煙波却笑陶朱計然策我來訪君春已深
江花江柳翻綠陰相攜三徑拾瑤草為問客來何苦
心固知此事君計得我被微官苦相逼勸君慎勿語
彈冠便恐紛紛北山檄沈周清江繞檻白鷗飛坐看
潮痕上釣磯松菊未荒元亮徑芰荷先製屈平衣窻
前楓葉曉初落亭下鱸魚秋正肥安
得從君理蓑笠權歌相趣入煙霏

環谷距寶華寺二里王珣總領之園亭花竹奇石環繞

其屋珣字德全介甫之後

見周益公南歸錄

石湖別墅在縣西南十二里參政范成大初因越來溪
故城隨地勢高下而為亭榭別築農圃堂對楞伽寺
孝宗御賜石湖二大字成大作上梁文云吳波萬頃
偶維風雨之舟越戍千年因築湖山之觀又有北山
堂千巖觀天鏡閣玉雪坡錦繡坡說虎軒夢魚軒綺
川亭盟鷗亭越來城等處以天鏡閣為第一一時名
人皆為文詞明道八年周益公過之留題壁間云吳
臺越壘距盤門才十里而陸沈於荒煙野草者千七

百年紫微舍人始別墅登臨之勝甲於東南豈鴟夷子成功於此扁舟去之天閔絕景須苗裔之賢者然後享其樂耶成大愧謝益公曰吾行四方園池多

矣如薌林盤圃尚之此趣非甲而何

范公題御書碑云淳熙八年三

月庚戌制書擢臣居守金陵閏六月丁亥朝行在庚寅辭後殿翼日既望詔錫清燕苑中皇帝親御翰墨大書石湖二字以賜天縱聖能游藝超絕典則高古如伏羲畫體勢奇逸如神禹碑日光雲章垂耀縑素環列改觀禁籞動色臣驚定喜極不知扞蹈昧死奉觴上千萬歲壽奉寶書以出越五日至於石湖藏焉石湖者具區東匯自為一壑號稱佳山水臣少長釣遊其間結茆種木久已成趣春秋時吳臺其陰越

城其陽登臨訪古徃蹟具在汙萊露蔓千七百餘年
莫有過而問者今猥以臣故徹聞高清天光博臨燕
及荒野繇開闢來未覩斯盛斐度李德裕皆唐宗臣
綠野平泉亦聲震當代揆今所蒙無傳焉何物么庸
獨冒寵赫百身萬殞莫能負戴臣蒲柳早秋仕無補
益縣官倘晚晚不休奸止足之戒則將上累隆知俯
愧初服臣用是懼冀幸少日遂賜骸骨歸老湖上宿
衛奎瑩與山川之神暨猿鶴松桂同在昭回中一介
姓名亦因是不朽使後世之人屬厭榮祿得全於桑
榆以無辱君賜則陛下丕顯休命不委於草莽庶幾
報恩之萬一臣既摩刻扁榜又被之琬琰以傳且附
著臣之自叙云爾七月朔端明殿學士中大夫知建
康軍府事兼管內勸農事提割本府界分諸鋪通角
充江南東路安撫使馬步軍都總管兼營田使兼行
宮留守吳縣開國伯食邑七百戶賜紫金魚袋臣范
成大拜手稽首謹書楊萬里題御書大字歌石湖僊

人補天手整頓乾坤屈伸肘爾來化作懶卧龍簌弄
珠璣漱瓊玖五雲萬里天九重玉皇深拱蓬萊宮豈
無九虎守閭闔北門半扉當朔風夜令雲師救風伯
鞭起卧龍湖底月湖水捲上天中央却鎖北門護風
雪僊人馭風乘綠雲玉宸殿上朝帝真帝將北斗酌
天酒冰桃碧藕脯麒麟傳呼玉螭吸銀浦照霜調冰
澆月窟灑成羲畫河洛書白璧一雙浮雨露石湖二
字天上錦奎星壁宿落山扉昭回不飾吳花草姑蘇
臺前近太微詩人不直一杯水自是渠儂命如紙教
人妬殺石湖僊手攬星辰懷袖底成大懷石湖舊隱
浩蕩沙鷗久倦飛摧頽握馬不勝鞿官中風月常虛
度夢裡關山或暫歸橘社十年霜欲飽鱸江一雨水
應肥冷雲著地埔蒲晚誰為披蓑暖釣磯說虎軒夜
坐白雲深處卧癡頑挂起東窻水月寬但得好詩來
眼底何須寶剎現毫端一身莫作官身想萬境都如
夢境看鱗舍鄰翁能日醉呼來分與一蒲團北山堂

開爐夜坐困眠醒坐一龕多竹洞無開斷客過貧向
爐中煨榾柮懶從掌上看維摩閒無雜念唯詩在老
不甘心奈鏡何八萬四千安樂法元無祕密可伽陀
寄題石湖海棠盛開二首手開芳逕越城頭紅錦屠
蘇結綺樓不把高枝銀燭照淡雲微月替人愁○老
懶君家似出家園林春色雨霑沙海棠尚自無心看
天女何須更散花三月十六日石湖書事二首春事
日以闌暑陰正清美拖筇入林下秀綠照衣袂盧橘
梅子黃櫻桃桑葢紫荷衣浪花顫筇破苔色起風日
收宿陰物色有新意隣曲知我歸爭來問何似病惱
今有無加飯日能幾掀髯謝父老衰雪已如此○種
木二十年手開南野荒冉冉新歲月依依舊林塘牙
來擅下濕岑蔚驕衆芳菱母尚能瘦竹孫如許長憶
初學圃時刀笠冒風霜今茲百不堪裏帽人扶將龍
鍾數能來猶勝兩相忘中秋後兩日自上沙回聞千
巖觀下巖桂盛開後儀舟石湖留賞遂賦二絕金粟

枝頭一夜開，故應全得小詩催。藍輿緩緩隨兒女，引入天香洞裏來。○千巖觀下碧瑤林，歲晚青青共此心。隱士歸兮花未老，每年來把一盃深。次韻徐提舉遊石湖三絕。三徑荒蕪岫幌開，錦車何事肯徘徊。春風相為高人住，落絮殘花好在哉。○日腳烘晴已破烟，山頭雲氣尚披緜。卻須多謝朝來雨，洗淨明湖鏡裏天。○天上麒麟朝墨林，富家手筆擅文心。欲知萬頃陂中意，但向三篇句裏尋。閏月四日石湖衆芳爛熳，北地南岡，揔是家兒童隨逐，任驪譁開嘗醵尾蒸來酒，點數春頭，接過花盡，把園林蒙錦繡，多添門戶鎖煙霞。杖藜想被東風笑，扶卻衰翁管物華。檢校石湖新山，今湖南野試開荒，分手耘耔草棘場下地，若千全種秫，高原無幾，謾栽桑蘆芽碧處，重增岸梅子黃時，早濬塘田里，只知溫飽事，從今拋卻半年忙。聞石湖海棠盛開，丘攜家過之，三絕。東風花信十分開，細意留連待我來。開過十分風不動，更無一片點蒼

苔○家人扶上錦城頭蜂蝶團中爛熳遊報荅春光
須小醉紅雲烟裏按伊州○低花妨帽小移筇深淺
燕脂一萬重不用高燒銀
燭照暖雲烘日正春濃

范公亭在崑山薦嚴寺後圃池上參政范成大少讀書
寺中遊息其上吳仁傑嘗扁之曰可賦後人遂以范
公名之

范家園在雍熙寺後范周無外所居有石刻三大字郡
守李大異書後移置文正公書院之右

南村在越來溪西吳山下寺簿盧瑑所居扁曰吳中第

一林泉有御書得妙堂扁時有廬園三十詠

南村紫關帶煙

堤吳中第一林泉佐書齋吳山堂正易堂紫芝軒瑞華軒靜宜軒玉華臺蒼谷來禽鴈逸民園植竹處江南煙雨圖香巖湖山清隱廳得妙堂雲邨香巖玉界古彥玉川館山陰畫中杏僊堂藕花洲桃花源三水流鵬其

二缺

郭氏園在飲馬橋西南本郭雲大夫所居有池號小滄浪後為魏克愚太卿所得

筠谷在西館橋之西待制榮薳所居薳字茂世舊寓道州結廬竹間號筠谷及知臨安引年勾祠陞辭之日

上以琉璃壺貯丹桂花且繪之便面題詩二十八字
併金帶為賜復書筠谷二大字寵其歸於是卜築吳
下終老焉

雙清亭在洞庭東山社下里建炎間郡人錢康功避地
於此康功舉進士通判楊黃滌三州官至朝奉大夫
醉眠亭宋李無晦作無晦名行中居淞江高尚不仕東

坡兄弟嘗過訪留題

蘇軾李行中醉眠亭詩已向閑
中作地僊更於酒裏得天全從

教世路風波惡賀監偏工水上眠○君且歸休我欲
眠人言此語出天然醉中對客眠何害須信陶潛未

苦賢○孝先風味也堪憐肯為周公晝日眠枕麴先生猶笑汝狂將空腹貯遺編蘇轍是非一醉了無餘惟有胸中萬卷書已把人生比蘧傳更將江浦作堦除欲眠賓客從教去倒卧鸞龍豈暇舒京洛舊游真夢裏秋風無復憶鱸魚

沈氏園亭在洞庭鎮下里人沈仲嘉所居孫覲有詩

何仔園亭在尹山種植甚繁而牡丹尤多周益公嘗遊

見南歸錄

醒心亭熙寧間曹僚履中所葺在荊門裡有土阜對峙水中雖巨浸弗沒號曰浮墩後避諱改名浮丘相傳

此地昔有雙松竦然參天建炎之難有潰兵欲伐之
隕石如雨乃止今放生池即其地也

樂園在清嘉坊北朱長文所居中有高岡清池喬松壽
檜此地錢氏為金谷園其父光祿卿始得之長文
營以為園併自作記鄉人尚其名德知州章岵表為
樂園坊有邃經堂華嚴菴招隱橋見山岡琴臺鶴室
墨池筆溪及西園草堂共二十景方子通元厚之程
公闢盧仲辛俱有詩元末張適號甘白築室於上題

曰樂圃林館與高季迪倪元鎮陳麟謝恭姚廣孝賡
和為十詠宣德間杜瓊得其東隅地名為東原結草
為亭曰延綠又有木瓜林芍藥階梨花埭紅槿藩馬
蘭波桃李溪八僊架三友軒古藤格芹澗橋凡十景

一時名流俱有詩

樂圃記大丈夫用於世則堯吾君
虞吾民其膏澤流乎天下及乎後

裔與夔契並其名與周召偶其功苟不用於世則或
漁或築或農或圃勞乃形逸乃心友沮溺肩綺季追
嚴鄭躡陶白窮通雖殊其樂一也故不以軒冕肆其
欲不以山林喪其節孔子曰樂天知命故不憂又稱
顏子在陋巷不改其樂可謂至德也已予嘗以樂名
圃其謂是乎始錢氏時廣陵王元璠者實守姑蘇好

治林園其諸徇其所好各因隙地而營之為臺為沼
今城中遺趾頗有存者吾園亦其一也錢氏去國園
為民居更數姓矣慶厯中予家祖母吳夫人始購得
之先大父與叔父或游焉或學焉每良辰美景則奉
板輿以觀於此厥後稍廣西墻以益其地凡廣輪逾
三十畝予嘗請營之以為先大父歸老之地熙寧之
末新築外垣盡覆之瓦方將結宇而親年不待既孤
而歸於是遂卜居焉月葺歲增今更數載雖敝屋無
華荒庭不甃而景趣質野若在巖谷此可尚也園中
有堂三楹堂旁有廡所以宅親黨也堂之南又為堂
三楹命之曰邃經所以講論六藝也邃經之東又有
米廩所以容歲儲也有鶴室所以畜鶴也有蒙齋所
以教童蒙也邃經之西北隅有岡命之曰見山岡上
有琴臺西隅有詠齋此予嘗拊琴賦詩於此所以名
云見山岡下有池水入於坤維跨流為門水由門縈
紆曲引至於岡側東為谿薄于巽隅池中有亭曰墨

池予嘗集百氏妙迹於此而展玩也池岸有亭曰筆
谿其清可以濯筆谿旁有釣渚其靜可以垂綸也釣
渚與邃經堂相直焉有三橋度谿而南出者謂之招
隱絕池至於墨池亭者謂之幽興循岡北走度水至
於西圃者謂之西圃西圃有草堂草堂之後有華嚴
菴草堂西南有土而高者謂之西五其木則松檜梧
栢黃楊冬青椅桐檉柳之類柯葉相蟠與風颺颺高
或參雲大或合抱或直如繩或曲如鉤或蔓如附或
偃如傲或參如鼎足或并如釵股或圓如蓋或深如
幄或如蛟虬卧或如驚蛇走名不可以盡記形不可
以殫書也雖雪霜之所摧壓颼霆之所擊撼搓牙摧
折而氣象未衰其花卉則春繁秋孤冬曄夏徭珍藤
幽臨高下相映蘭菊猗猗兼葭蒼蒼碧薜覆岸慈筠
列砌藥錄所收雅記所名得之不為不多桑柘可蠶
麻紵可緝時果分蹊嘉蔬蒲畦標梅沈李剥瓜斷瓠
以娛賓友以約親屬此其所有也予於此園朝則誦

犧文之易孔氏之春秋索書之精微明禮樂之度數
夕則泛覽羣史厯觀百氏考古人是非正前史得失
當其暇也曳杖逍遙陟高臨深飛翰不驚皓鶴前引
揭厲於淺流躊躇於平臯種木灌園寒耕暑耘雖三
事之位萬鍾之祿不足以易吾樂也然予觀羣動無
一物非空者安用拘於此以自贊耶異日子春之疾
瘳向平之累遣將扁舟桴海浮遊山嶽莫知其所終
極雖然此圃者吾先光祿之所遺吾致力於此者久
矣豈能忘情哉凡吾衆弟若子若孫尚克守之母顏
爾居毋伐爾林學於斯是亦足以為樂矣予豈能獨
樂哉昔戴顓寓居魯望歸隱遺迹迄今猶存千載之
後吳人猶嘗指此相告曰此朱氏之故圃也元豐三
年十二月朔吳郡朱伯原記元絳詩白頭重到故人
家境是人非起歎嗟三徑未荒陶令菊四時長放庾
郎花林風光動藏鶯葉溪浪痕生宿鷺沙肯構有材
移病久會憑詩酒傲煙霞程師孟次韻少年為學已

名家纔折丹枝病可嗟節帶冰霜凌萬竹文含風露
麗千花世憐美玉猶存璞人恨良金未出沙賴有隱
居如谷口直將高意抗青霞○君家幽寂似山家聞
者其誰不見嗟閉戶幾多閒日月掃園無限舊煙花
書窻燕坐琴橫石吟徑徐行杖卓沙壁有謝公題好
句國入方此識餘霞○碧瓦春城十萬家可憐夫子
獨堪嗟林園猶有前朝木冠蓋難尋故主花亭瞰夕
陽鄰古剎池通野外見晴沙天然操尚無塵滓合佳
蓬萊弄彩霞盧革姑蘇右浙會園榭森相望之子脫
名瑣自放無何鄉虛堂布遺經周孔之文章靜齋播
風雅絃音日洋洋吮毫濯曲溪汎墨散方塘抱琴獨
登臺望山間涉岡釣渚閱游泳竹路排青蒼亭幽小
勻迥紅白相低昂予此謝病歸旅吳歲月長常聞君
園勝欲往兩足僵開緘味題詠恍若披圖詳吾聞玉
川子破屋洛之陽東野廢官守止坐叢瀨傍豈如吾
子樂游息藹有方朝廷日清明百度良施張子既難

其進論撰亦有光退之謂子厚窮久道益強文辭煥
垂後將相未可當窮愁乃著書心志能渾剛儻來奚
足卹令名期自將張適何處是吾廬城西數畝餘坊
存前哲號屋野古人書已疾親栽藥供飧自灌蔬長
年因謝俗戶外少來車。林密簾攏瞑門清樹石連
合香來雨霽壓酒及花前嗜古思先輩傷今話昔年
何由清鬱抱春茗淪林泉高啓林塢通幽間山明雲
出溪門無俗客至池有水禽啼對酌山花下行吟野
竹西石床春寂寂苔色映青藜。開軒時野眺山色
翠迢遙屏結霜中檜圖開雪裏蕉煖烟初扇圓野水
欲平橋曳杖閑來往時挑酒一瓢。幽居無灑掃風
景自脩然紅濕花間雨青分柳外烟山窻捫虱坐石
榻枕書眠自得閒中趣栽花疊錦川陳林和桃花夾
林館宛似武陵溪醉後拋書枕夢回聞鳥啼水光孤
墅外山色小橋西盡日無來客徐吟信杖藜。見說
林居好終朝無雜賓捲簾通紫鷺投餌釣金鱗竹影

雲連榻楊花雪點巾開池養鵝鴨不使惱比隣謝茶
故人非傲吏舊隱勝愚溪塵世人難到空林鳥自啼
青山懸榻下綠樹斷崖西終日無餘事全家盡日黎
○門徑稀人跡幽居只自然泉聲三月雨柳色半春
烟水檻看鷗浴山窻見鹿眠題詩花墅夕明月蒲晴
川宿樂園林館倪瓚莫投齋館靜城郭似幽林落月
半床影涼風孤鶴音汀雲縈遠夢桐露濕清琴喧早
靜塵慮蕭爽集冲襟過張水部樂園林館高啓清和
池館閉閑苔輕憶尋幽觸雨來井桁水聲繩乍轉牀
屏山色畫初開穿花百舌深絨口吹絮雙鱗半露腮
好賦一詩題壁去
主人未肯便塵埃

北園在漳潭陳氏園也石湖范成大書扁東浦黃簡為
記

五柳園在塗松鎮隱士胡嶧遊憩之所今廢

玩芳亭國子學錄吳仁傑斗南所築有記陸游楊萬里有詩又風月亭顏僚作聞在崑山

崑山亭趙訓大猷所築在馬鞍山陽吳斗南取元次山溪以浯名旌吾獨有之語為名

定軒在震澤鎮宋工部侍郎楊紹雲所居有桃源洞廣數畝異石林立劉文簡公真文忠公皆有著述遺址

猶存

定軒記震澤楊公以定名軒予謂定一也而有老氏浮屠氏之定未知公之志果奚所屬也自

儒者言之則大學自定而靜靜而安安而慮慮而得其寂然不動者正所謂感通之體也自二氏言之則其所謂泰定所謂禪定者兀然枯槁而已爾漠然清虛而已爾人之一心與造化作大者以其往來闔闢之窮動靜出入之俱妙也今以兀然漠然者為定則是無用之體不感之寂也其可乎公以敏達果銳之材而為明天子所任屬蓋嘗屏上游護天塹開大幙府制置長淮而又法從近臣而總六師之賦其志存乎立功其誼顯乎報主固非棲心無用者比也則其所屬必儒者而非二氏奚疑雖然定之難能也久矣自窮居獨善之士捐百事息萬慮以求之有終其身而弗獲者沉於履功名之塗踐富貴之境凡為吾耳目之勝心志之域紛至錯立於前苑枯榮醜可喜可駭者日百千變其亟疾若破山之霆其震蕩若發屋之風其眩亂反覆又若一葉之艇而舞翻空之濤甚矣哉定之難能也若是者其疾焉在曰心無主而

已矣竊嘗聞之敬則心有主而物聽命不敬則物為主而我從之古之君子對妻子猶君師之臨處幽室甚十目之睹所以養吾心而為萬物之主也心有主然後有定見有定見然後有定力酬酢萬變無不可者是則儒者之定而公之所志也夫理有定而事無方隨事以應之使各通其可即所謂定也若乃處義未精而猥曰吾守之不可易是直私意之錮爾烏足語定乎哉故主敬窮理相交為用東魯西洛之正傳有不可誣者公之大父紫微公受學於伊川之門人為先朝侍從公之所學自其家世且方撙繁劇而不亂遭變故而不懾其於定之一言用力深矣顧何足以發公之志姑誦所聞以復命云權工部尚書兼太子右庶子兼左諭
德建陽劉燦記

樂菴在崑山圓明村宋侍御史李衡彥平歸老之地四

旁皆脩竹經籍圖史蒲堂

樂庵初成彦平自為詩二絕老子平生百不足菴成

那管食無肉終朝閉戶只讀書四面開窻都見竹○投老庵居百事宜早眠安起不論時更長睡足披衣

坐傾耳林間聽畫眉

盤野黃由之別墅寧宗賜名內有墨莊胡夫人真蹟三

清閣共樂堂等扁由自作詩

共樂堂纔到松陵即是家蒲堂佳客蒲園花看

花拚客須清賞休向人間俗子誇聯德堂纔到松陵即是家便須洗盞泛流霞軟紅塵裡風波惡不似江頭與海槎茆堂觀杏纔到松陵即是家茆堂萬竹綠交如午窻睡起無他想坐看圍棋到日斜登明月臺纔到松陵即是家擎空皎月瑩無瑕直須臺上分明看擬欲呼仙汎海槎登雍書樓有感纔到松陵即是

家樓高不管綠楊遮有書萬卷時翻弄千古興亡幾
歎嗟道院獨步纔到松陵即是家參天檜栢古槎牙
杖藜終日頻來往不羨堤邊路築沙登三清閣纔到
松陵即是家三清閣下寂無譁小臣愧乏絲毫報深
炷爐香淨點茶入園纔到松陵即是家故園喜聽鵲
喳喳主人只為貪風月蠻觸交爭笑爾蝸睦隣纔到
松陵即是家民間何處不桑麻欣欣老稚迎門笑斗
酒相歡亦孔嘉無題纔到松陵即是家休論恬淡與
榮華古來顏路俱塵土自有時賢定等差思親纔到
松陵即是家仙翁詩句發天葩鈍才不及賡餘韻留
取時時
罩碧紗

松竹林在崑山縣治南宋知縣項公澤所居

譚氏園在嘉定月浦上花卉奇絕亭館華麗今廢

鄭氏園在馬鞍山前鄭竦所築葉丞相扁為玉峯佳處
西偏有道院植牡丹數百本又作止足堂亦葉丞相
書

南園崑山瞿惠夫所居楊廉夫為記

翁氏園在崑山縣治西吳斗南有賞木芙蓉詩

松石軒在吳城中參政宋廷珍之第軒前古松蛟騰怪

石鵠峙鄱陽周伯琦扁曰松石有詩詠之

鄭元祐松石軒記昔

夏后氏畫九州而青州有鉛松怪石之貢當是時未必有耳目玩好也儒先不能無疑於此焉以愚觀之

玩好於時未必然然韶樂以球為主故后夔言樂獨
於石則曰予擊石拊石然後言百獸率舞鳳凰來儀
蓋石音難和故磬必泗濱之浮今以靈壁所產石用
以為磬然非秀絕者不能有聲音之純故商頌曰既
和且平依我磬聲然則怪石之貢蓋必異於尋常也
已降自唐宋始以石為玩好然後石之品益繁宋宣
和間於物無不品定顧以太湖石品最高唐李贊皇
牛奇章章二人相業雖不同其於愛石則一也中吳在
宋為畿甸至今荒園廢宅一燬於劫灰者在在有之
若夫松之為貢棟梁橡桷無不可者至乃蟠紐詰屈
懸根獻秀始以松為園池亭沼之觀玩今大參澄江
宋公出總戎機入贊朝政私第在吳城之正中沈深
宏敞其客次有松有石左轄鄱陽周公扁之曰松石
軒仍為之作大篆以表章之矣大參公儼之於松則
清廟棟梁也儼之於石則韶樂天球也賓至而燕集
於茲語笑於茲挹松之堅貞攬石之秀潤其所以為

國幹播民和者夫豈尋常松石之謂哉伯琦詩華清
貢秀萃雙清石友松君宿締盟鱗甲高騫風雨合洞
巖虛激珮環聲平泉官暇延遊盼綠野功成寄賞情
誰為澄江脩郡乘好將勝迹播芳名蔣堂一桁湘簾
細織紋華軒窻氣襲書裙老枝月冷蛟龍骨蹲璞苔
封虎豹文隱迹雅同真處士彎弓懸憶舊將軍由來
柱石居廊廟沈爾雲霄策勲董晉愛此軒窻隔市
廛疎松偃蹇石嶄然瘦蛟匝地弄明月蒼翠拂闌生
紫烟大厦棟梁真可擬中流砥柱若為遷何人下拜
清風裏不是韋郎是米顛成廷珪長松落落風塵表
蒼石堂堂太古心屹立乾坤無改色叩之金玉有餘
音人間兒女天機淺海上神仙野趣深獨有奇章知
此意子孫清賞到於今饒介蒼松鬱鬱石嵯峨上下
因依有女蘿虎魄凝流千歲少羊羣分跪一拳多所
須為地期相向遂以名軒示不磨賓
客定如東閣盛或來醉卧或吟哦

光祿亭在虞山南五里許邑人張枏所建亭前大杏一本花特茂異又名杏花亭枏嘗為三衢守花時騷人墨客遊賞題詠甚多今廢矣

水花園在同里鎮元人葉振宗所居廣數里有聚書樓約鷗亭小垂虹池閣石梁映帶左右名水花園今廢為魚叢

綠水園在孫老橋東故為朱勔別墅元至正中廬山陳惟寅惟允兄弟購得之取杜詩名園依綠水之句更

此名園中有來鴻軒清冷閣蘿徑等名高啓為之序

高啓綠水園雜詠序吳城南陬有曰朱家園者父老言宋朱勔故墅也廬山陳惟寅氏得之更名曰綠水以園中有池且用杜子美詩語也其林沼亭軒亦各有扁焉近雖破廢然寬閒幽勝猶可以釣游而嘯歌惟寅以余往來其中最熟求徧詠之噫當勔以倖貴時窮尚豪侈園中之珍木異石崇臺峽榭固當百倍於此文人詞客為之稱美而誇詠者亦多矣今皆跡滅響沈無復可覩惟寅雖窮居隱約而能以詩書其業篤於孝友其清德雅操固可以蔑視勔矣則余為之執筆亦可以無愧焉因不復辭且庶幾或傳使父老知園之更名綠水者自惟寅始也詩凡十六篇張羽綠水園燕集芳園逼江城迴波遠舍清主人擅文學過客總簪纓適向吳中會何殊洛下英唐虞共數講風雅用和賡矍鑠攻辭健鏗鏘得句精建安方合

體大厯却徒名還展花前席仍敲竹下枰吟餘歌秋
杜醉裡聽鷓鴣徑竹斑初脫庭蕉綠已呈渾忘在離
亂惟欲盼承平蝸窟休圖隱難壇可負盟從容
四美其感激二難并更願相加勉留傳汗簡聲

萬玉清秋軒在吳江同里鎮元江南財賦司副使里人

甯昌言之別墅中有菊坡梧桐脩竹搃謂之萬玉清

秋華亭繪士張可觀為之圖

郭登詩王謝堂前久不歸野田荒樹幾斜暉花

開花落秋還在年去年來事已非楊柳風多凋翠縷
芙蓉霜重濕紅衣故人空感山陽笛一段傷心畫所
微楊溥社鷺賓鴻共歲華松陵未黍故侯家誰令千
載柴桑裏一度秋風一度花劉鉉甯公在昔稱時賢
頭顱半白來歸田老懷澹泊慕幽雅高居別築臨同
川數畝園林占清勝四時景物誇奇妍賓從日盈北

海座琴樽晚載南湖船一朝陵谷那知變廢盡東吳
舊庭院扶疎脩竹為誰清零落芙蓉不成片白雲飛
去不復來只有堂前舊時燕春深幾樹花亂開無復
常窻映人面繁華事往今已休東床老去懷舊遊歌
舞重尋館甥處蕭索碧梧風雨秋陶令宅邊松尚在
習家池上水空流追思自足興感慨何獨對此方為
愁六十年來駒過隙倏忽自足興感慨何獨對此方為
無聞流落人間匪朝夕客從何處遠持來佳致依然
不殊昔夢回昨夜到松
陵鐘斷長橋月初白

團溪魚樂在沙頭鎮月蕉瞿逢祥隱居楊廉夫為記

正至

八年二月月蕉瞿先生逢祥肥遁海東之團溪雲葉
展空煙花膩陌子嘗循鳳溪而下步自團溪之陽顧
瞻周遭若環帶然地固卑而臨中有隱君子之風焉
先生居是溪歷宋咸淳僅百五十年予觀東南若震

澤諸水道經咸浦會歸於海風濤激蕩沙岸日崩走
濱浦之人恒懼之而先生則弗懼且樂焉者溪之左
枕市廛障咸水以便商者右遡畎畝引咸水以利耕
者乃若細雨侵沙波流若穀魚鳥浮沈天光上下先
生則投竿而漁涼月浸軒秋聲在樹子鶴和鳴人影
相逐先生則援琴而歌於乎溪之樂人或見之而不
知之先生獨能知而樂之可謂得性情之正矣

周氏園在雙鳳里人周棠所闢廣二十餘畝嘉樹美竹
映帶亭館今其諸孫有登科者

南村在綺川元末隱士張濤所居有素心堂陶菴苔翠
館雪侑亭

耕獲亭秦約作在太倉西渚之北

小丹丘天台陳基敬初所居敬初仕偽周為內史得小園於天心里以天台為丹邱因以名之金華戴良記夏家園在崑山太常卿夏杲致仕遊樂之地

小洞庭劉僉憲廷美自山西致政歸即齊門外舊宅累石為山號小洞庭有十景曰撚髭亭藕花洲等名天全徐武功伯為之序

思菴郊居在常熟郭門外都憲吳公所勅周文襄公巡

撫時有詩

東莊吳文定公父孟融所治也中有十景孟融之孫奕

又增建看雲臨渚二亭

侍講李東陽記蘇之地多水葑門之內吳翁之東莊在焉

菱濠匯其東西溪帶其西兩港旁達皆可舟而至也由橈橋而入則為稻畦折而南為桑園又西為菓園又南為菜園又東為振衣臺又南西為折桂橋由艇子浜而入則為麥丘由荷花灣而入則為竹田區分絡貫其廣六十畝而作堂其中曰續古之堂菴曰拙修之菴軒曰耕息之軒又作亭於南池曰知樂之亭亭成而莊之事始備總名之曰東莊因自號曰東莊翁莊之為吳氏居數世矣由元季逮於國初鄰之死徙者十八九而吳廬巋然獨存翁少喪其先君子徙而西既而重念先業不敢廢歲拓時葺謹其封濬課

其耕藝而時作息焉翁仲子原博以狀元及第入翰林為修撰獲以其官封翁朝士與修撰君游者聞翁賢多為東莊之詩詩成而莊之名益著修撰君以謂予曰幸吾子之識之也夫人之業未有不勤成而侈廢者翁之為東莊也承往弊而修之懇惓劬瘁歷數十年然後備亦既艱矣而翁又遵道畏法雖處富貴泊然與韋布者類則所謂保其業者豈苟然哉易曰幹父之蠱有子考无咎厲終吉由是觀之翁之業雖百世可知也吾又聞翁積而能散衣食餓汲汲若不暇則是莊也寧直以自樂為燕游而已今修撰君科甲重朝廷文章望天下愛民憂國恒存乎心而見乎眉睫則推翁之心以達之天下又豈直足保其私業為茲莊山水之重而已邪然君子論家業之難考世德之有歸信文獻之不可無者必自茲莊始作東莊記成化己未秋七月既望翰林院侍講李東陽書劉大夏詩吳下園林賽洛陽百年今獨見東莊迴溪

不隔柴門迴流水應通世澤長十里香風來桂塢蒲
簾涼月浸菱塘天公自與莊翁厚又把栽培付令郎
李士實小莊隨意作經營園漫分蔬地漫耕流水聲
中看杖倚人家叢裏有舟行市廛咫尺疑無路林壑
分明不出城昨日玉堂新賜詔乾坤誰信問逃名沈
周東莊水木有清輝地靜人間與世違瓜圃熟時供
路竭稻畦收後問鄰饑城頭日出啼鴉散堂上春深
乳燕飛更羨賢郎今玉署恩封早晚著朝衣吳寬聞
葉經構二亭於東莊以為予佚老喜而有作爾父西
菴扁拙修當年種樹帶平疇近聞冒構為予計專待
歸休與客游山上看雲依鶴峒池邊臨渚對桑洲只
憂筋力非輕健更欲沿洄具小舟沈周次韻特意作
亭知好修石基高築樹為疇欲承伯氏歸休樂未許
他人造次游細路矮橋緣麥隴長濠新水漫蘋洲宰
公果遂南還興我
亦浜頭艤小舟

姑蘇志卷三十二